

[www.BibleForChildren.org](http://www.BibleForChildren.org)



TUTU  
JUAAN 14



[Ni vii cahan ra Jesuu chi ra sacuaha chi ra:] 'Ña cua saxini ndo. Cua cuinu ini ndo chi ra Ndioo, ta cua cuinu tahan ini ndo chihin yu. Nu iyo suti iyo cuaha xaan nuun cua coo ñivi. Chahi cuenda chi ndo, vati cha ndicha cuu chi. Chacan cuu cha cua cuhin tican, ta cua tiso vahi nu cua coo ndo.



Tu cua cuhin, ta cua tiso vahi nu cua coo ndo, cua quichi ndico tuqui, vati cua quichi quihin yu chihin ndo. Chacan cuu cha cua coo tahan ndo nu cua coi, ta chito ndo ndaa iti cua cuhin —cati ra Jesuu.



Yuhu ra Juaan cuu yani ndo, ta cha ni ndehe tahin tu  
ndoho cuenda ra Jesuu, ta cua coo tahin chi ndo nu  
cua cundaca ñahan ra Ndioo, soco cua

cundee ini tahin nda cua nda  
quivi can.



Ni chacoï iti ñuhun Patmo, ta mahñu nduta caa ñuhun  
can. Ni chacoï tican, vati ni cati tuhin tuhun Ndioo, ta  
ni chahi cuenda yoso cuhva iyo ra Jesuu.


[Chacan cuu cha ni chacoï chi  
tu ndoho tican.]



Tacan cuu, ta chacoo ndico tu ndee ini cha chaha ra Tati Ndioo, ta naan ndico tucu ini yu. ¡Jihna! Ndehi ti iyo iin tayu ra cuu tiñu iti siqui andivi, ta ndaa iin rai nu tayu can.




Chini tahin ti cha cahan ndihi ñivi. Cahan ndihi ri quitu cuhu.  
Cahan ndihi cha ni savaha ra Ndioo. Cahan ñi cha iyo iti siqui  
andivi, ta cahan tahan ñi cha iyo iti nu  
ñuhun ñuñivi, ta cati ñi ti: Cahnu xaan  
rai cuu ra ndaa nu tayu ya, ta cahnu  
xaan rai cuu ra cuu mbee ya. Chi maan  
ra iyo tu ndee ini, ta chi maan ra iyo  
ndatu. Na cua  
cuu chi tacan ni  
ndihi ni quivi  
ndihi ni tiempu,  
cati ñi.



Tacan cuu, ta ndehi ñuun Jerusalén chaa. Ñuun ii cuu chi, ta vachi chi iti siqui andivi nu iyo ra Ndioo. Taqui xaan chi cuu, vati kuhva iyo iin ña chanu cha ndutaqui ña chi ii ña iyo ñuun can. Tacan cuu, ta chini yu ti cahan iin ñivi iyo nu iyo tayu cahnu can. Nihin suhva cahan ñi, ta cati ñi ti: —Vitin cha iyo

cuiti ñivi nu iyo ra Ndioo, ta icaa ni cua coo ra chi ñi. Cua cuu ñi ñivi ra, ta suvi ni maan ra Ndioo cua coo chi ñi.



Tacan cuu, ta sanahan ra tatun Ndioo chihin yu ti iyo iin yuta.  
Tichi tayu nu ndaa ra Ndioo chi ra cuu ta iin mbee quee  
nduta can. Taqui ndicha iyo chi, ta cuaan cuaan iyo chi.  
Cuenda cha cua coo ndito ñivi iyo nduta can, ta mahñu iti  
cahnu tichi ñuun can iyo iin yutun.



Ñahni ri nicandi iyo ñuun can, ta ñahni ri yoo iyo, vati ndichin xaan iyo ra Ndioo, ta ndichin tahan iyo ra cuu ta iin mbee.




Cua coo cha cahnu cha  
iyo chi ndihi ñivi ñuun  
can, soco ñahni cha quini  
cua coo. Ña cua coo ñivi  
ndacu ndavaha ni. Ña cua  
coo ñivi sandahyu ñahan.  
Mani ñivi iyo sivi nu tutu  
cua coo ndito chi ra cuu  
ta iin mbee can.




Maan ra cua sanaan ndihi tu cuihya  
ini cha iyo chi ñi, ta ña cua cuvi ca  
ñi. Ña cua coo ca tu cuihya ini chi ñi.  
Ña cua ndahyu ca ñi, ta ni ña cua  
coo ca tu ndoho chi ñi, vati cha ni  
naan cuhya ni chacoo nu quichi  
quivi —cati ñi.




Ñahni ca cha ndavaha ni cua coo. Mani maan ra Ndioo ni cua coo nu tayu ra. Cua coo tahan maan ra cuu ta iin mbee can, ta ñivi ra—cua sacahnu ñi chi ra. Cua ndehe ñi nuun ra Ndioo, ta sivi ra cua ndoo nutaan ñi, vati iyo cuii ñi chi ra.



Tacan cuu, ta ni ndehi ti nducuiti ñivi cha ni chihi. Nducuiti ñi cuu ñivi cahnu, ta nducuiti ñi cuu ñivi ndahvi. Iti nuun ra Ndioo nducuiti ñi, ta nuna tutu ndiso cuenda yoso cuhva ni chacoo ñi, ta iyo inga tutu. Nuna tahan chi, ta ndiso chi sivi ñivi cua coo ndito chi ra Ndioo. Cuhva ndiso tutu can, cuhva cha ni savaha ñi ni cutuni ñi ta ñi. Tu ña iyo sivi ñivi nu tutu ra Ndioo, ña cua coo ndito ñi chi ra, soco cua tava ndaa ra chi ñi nu cayu ñuhun xaan.



Tacan cuu, ta cati ra Tati Ndioo, ta cati tahan ñivi cuu sava ta  
cua ña chanu ra cuu ta iin mbee ti: —Na cua quichi cun —cati  
ñi chi ra chahnu Jesuu. Ndihi ndo chini tuhun ya—na cua cati  
tahan ndo chi ra ti: —Na cua quichi cun —cua cati ndo. Tu iyo  
ñivi cuni ñi coo vaha ñi, na cua coo ndito ñi chi ra Ndioo, ta  
ñahni cha cua  
tiahvi ñi.



[Ni vii cahan ra Jesuu:] 'Cundahvi xaan ini ra Ndioo chi ñivi ñuñivi. Chacan cuu cha ni tava tiñu ra chi sehe ra, ta iin tuhun ni sehe ra iyo. Chacan cuu cha ña cua ndoyo ñuhun ñivi chinu ini chi ra, soco cua coo ndito ñi chi ra Ndioo ndihi ni quivi ndihi ni tiempu.



Romans 3:23 Iyo cuati chi ndihi ñivi, ta cumani cha cua  
coo vaha ñi cuhva iyo vaha ndicha ra Ndioo.

Romans 6:23 Tu cua savaha ñivi cuati, cua ndoyo ñuhun  
ñi cuenda ra Ndioo, soco tu cua coo inuun ñivi chi ra  
chahnu Cristo Jesuu, cua cuhva ra Ndioo cha cua coo  
ndito ñi chi ra ndihi ni quivi ndihi ni tiempu.

Hebrews 9:27 Cha ni tiso ra Ndioo ti iin tuhun ni chaha  
cua cuvi ñivi, ta sa cua queta quivi cua cutuni ñi.

Ephesians 2:8,9 Savaha ra tu manini, ta chacan ni  
nduvaha anima ndo, vati chinu ini ndo chi ra. Ñavi cha  
savaha maan ndo cuu chacan. Cha samani ra Ndioo cuu  
chi. Ñavi cha savaha maan yo cuu chi, coto  
cua ndurai yo.



Romans 10:9,10 Tu cua cati cachin ndo ti ndaca ñahan ra chahnu Jesuu chi ndo, tu cua cuinu ini ndo chi anima ndo ti chaha ra Ndioo tu ndee ini chi ra, ta natacu ndico ra tañu ñivi ndii, tu tacan ni cua cati ndo, cua coso vaha anima ndo chi ra Ndioo. Chinu ini yo chi anima yo. Chacan cuu cha ni chacosu vaha anima yo chi ra Ndioo. Chaha yo cuenda ti ra Cristo cuu ra ndaca ñahan chi yo. Chacan cuu cha ni nduvaha anima yo.

John 3:16,17 [Ni vii cahan ra Jesuu:] 'Cundahvi xaan ini ra Ndioo chi ñivi ñuñivi. Chacan cuu cha ni tava tiñu ra chi sehe ra, ta iin tuhun ni sehe ra iyo. Chacan cuu cha ña cua ndoyo ñuhun ñivi chinu ini chi ra, soco cua coo ndito ñi chi ra Ndioo ndihi ni quivi ndihi ni tiempu. Ni tava tiñu ra Ndioo chi sehe ra, vati cuni ra cha cua sacacu sehe ra chi ñivi ñuñivi. Ña cuni ra Ndioo cha cua tachi tuni sehe ra chi ñi.



1 John 5:11-13 Chaha ra Ndioo cuenda chi yo ti cua cuhva ra cha cua coo ndito yo chihin ra ndihi ni quivi ndihi ni tiempu. Cua coo ndito yo cuenda cha ni savaha sehe ra. Tu cua cuinda naan ñivi chi ra cuu sehe Ndioo, cua coo ndito ñi chi ra ndihi ni quivi ndihi ni tiempu. Tu ña cua cuinda naan ñi chi ra, ña cua coo ndito ñi chi ra. Ndihi tuhun ya tai chihin ndo, vati cha chinu ini ndo chi ra cuu sehe Ndioo. Chacan cuu cha chito ndo ti cua coo ndito ndo chi ra ndihi ni quivi ndihi ni tiempu.



TUTU JUAAN 14; 2 TUTU II CORINTIO 5;  
TUTU APOCALISI 4, 21, 22

Storyline by: Edward D. Hughes

Illustrated by: Lazarus  
and Alastair Paterson

Adapted by: Sarah S.

Mixtec, Pinotepa Nacional NT (mio) © 1980, Wycliffe  
Bible Translators, Inc. All rights reserved.

<https://live.bible.is/bible/MIOWBT/MAT/1>

©2025 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

